

BEKOLOSENSE

É Kálara Bekolosense

1 ¹ Pablo, ápostol Yesukristo amú nkómánn Nzamá, ya mwadzaŋ Timoteo, ² á mfá mitópbán ya bebébéla bé bóbédzaŋ ébe Kristo béye bé toó á Kolosa. Mvɔmm ya mína, ya mvwaá, ébe Nzamá Éséá wea.

Ávé akíba ákála bebwíni béye á Kolosa

³ Bía vé Nzamá akíba, Éséá Yesukristo Ntí wea, b́í yaglan fe bíyɔŋ bíse ákála denan, ⁴ niané bíá wórán mbwínánn wenan ébe Kristo Yesus ya fe edziŋ míni belé ébe mítópbán míse, ⁵ amú oyan wenan bá baale wo á dzóp été, éwí míni ngá tára wók ya bebébéla éfá, mbamba fwéñ, ⁶ éwí ó sian yaá ébe mína; amvála ané wá ke fe wá wúm bibumá ya ávémm éniŋ ngúrá, amvála te fe eé bɔ ébe mína atée ye é mos míni ngá wók ya áyem é mvɔmm Nzamá á bebébéla été, ⁷ ané míni ngá yága ébe Epafras, ndzindziŋ oloá fufúlu ya bía, éñí a ne bebébéla mvwála b́sénñ Kristo ákála denan, ⁸ éñe fe a ngá lére bía édziŋ denan ye á Nsísim été.

Áyaglan ákála bebwíni béye á Kolosa

⁹ Amú dzam te, bía, atée ye é mos bí ngá wók dɔ, bíá dzɔɔ ná bía yaglan ákála denan ya ádzaa ná míni tɔbɔ ndzálánn ya nyemann ye á nkómánn weñ, á fak ése ya á kén ése ye á nsísim été; ¹⁰ á mfá ye ná míni wulu amvála ané dá ñep ya Ntí, míní vé ñí nlém mesán ébe dzam áse, míní wúm bibumá bíye bembamba mibɔann míse, míní vé fe ébe á nyemann Nzamá; ¹¹ tɔbɔgán ya nguu ése ámvála é nguu edzwée ye é dúmá deñ e ne ná, míní tɔbɔ mbán ya edzíp ya mesán; ¹² míní vé fe Éséá akíba, éñe aá téle mína mikɔkgán ná míni ñɔŋ ngap ébe é tsigá mítópbán mí bot éyéá été; ¹³ aá koro bía ébe edzwée ye ó dzíbi ósí, á kén bía téle édzwée ngómán ndzindziŋ mwán weñ, ¹⁴ ébe éñe bí belé akoroga [ya mékií meñ], ndzámánn misémm.

Éwólo Kristo dá kúluban éyéá été

¹⁵ Éñe a ne évagle é Nzamá a ne kaa áyéne,

ntóó Mwán ye é dzóm áse bé ngá vele.

16 Amú ná baá vele byém bíse ébe éñe

á dzóp été, ya é sí ñí,

émá má yéne

ya émá mé ne kaa áyéne;

ané bítóó bídzwée, ané menguu bidzwée, ané betébosú, ngé ki

bengóvina,

bé ngá vele byém bíse ébe éñe ya akála deñ.

17 Éñe a ne byém bíse ósú,

ébe éñe byém bíse byá bí tóó fe nkommann.

18 Éñe fe a ne nló ye é ñúu

é ne ekóánn bebwíni,

éñe a ne atáraga,

ntóó mot ye bewú été,

á mfá ye ná éñe á tébe dzam áse ósú.

19 Amú Nzamá a ngá yén mvéañ ná

ndzálánn ye mam mése éñe ó tóó ébe éñe,

20 ya ébe éñe, aá bera álat dzóm áse angomm ébe émyen,

eé vé mvwaá ákála mekií méye é krús deñ,

ané é byém bí ne é sí ñí, ngé ki é byém bí ne á dzóp été.

21 Éde mína, ébe métám ómvús míní mbé beyín, minzínzínñ ákála osímánn wenan ye á bembéa mibɔann été. 22 Ve éndagá a kom yaá elat mínabe bó ya é ñúu mison deñ, ákála awú deñ, á mfá ye ná á lére mína ébe ású deñ mína mífúfúp, míní tóó kaa meyeññ, kaa ki ya meku. 23 Ngé é ne bebélá ná, míní tóó mbán á mbwínánn été, mbemann, kaa ki áfógan ébe oyan ye é mbamba fwéñ míní wók yaá, éñí bá kat fwéñ ébe byém bíse bíye bí ne mvelann á dzóp así, édí te fe ma Pablo bé téle ya ma do mvwála bíséññ.

Éséññ Pablo ékóánn bebwíni ye á Kolosa

24 Éndagá ma sán ébe midzuúk myam akála denan, ma dzálá fe ébe mámyen mídzuúk myá dzéñ ébe Kristo, akála é ñúu deñ, édo é ne ekóánn bebwíni. 25 Édí te édo bé ngá téle ma mvwála bíséññ, amvála ané mbaale ye éséññ Nzamá a vé yaá ma á mfá wenan, ná me mana dzálá éfíá Nzamá, 26 édí dá nzaman kén mot dá é tóó fe asweññ metám méye ókuá ya mimyee mí bot, ve éndagá é léreban yaá ébe mítópbán mí bot myeñ; 27 ébe ébá meyeñ mefé été, Nzamá a ngá kómo lére ntam ye á dúmá ye édí dá nzaman kén mot dí, édo e ne é Kristo a ne mína été, oyan ye á dúmá.

28 Éñe bía kat bot fwéñ, bíí lép bot bése, bíí yágale fe bot bése á kén ése été, á mfá ye álére mot áse a tóó ewólo ébe Kristo. 29 Ya dzam te édo ma

bíra sêñ meé yém nguu, amvála ané é nguu édzwée deñ da bíra belan ya ma.

2 ¹Amú ma kómo ná míní yem é bora meyítán me belé á mfá wenan, ya é bot bé ne á Laodisea, ya fe é bot bevós béye bé ne ná báá bé ma átára áyén mámyen ású, ²á mfá ye ná milém myeba mí biñ nguu niané mí fulan yaá édziñ été, ákála mitam míse myá só ya ndzálánn ya bébélá nyemann ye édí dá nzaman kén mot ébe Nzamá, édo e ne Kristo; ³ébe éñe, mitam míse míye á kén ya nyemann mí ne áswēñ.

⁴Ma kóbo édí te, á mfá ye ná mot enziñ a táa mína duk ya akéññ nkóbo. ⁵Amú ná atwaa mámyen me ne kós ó mís, ve me ne bíabe mína á nsísim été, meé sán, meé yén fe é mbamba nkomann mam wenan ya ámvála míní tós mbán á mbwínánn wenan été ébe Kristo.

Míní táa bera ábulán étós oloá ye á metsiñj ásí

⁶Édo ná, ámvála míní ngá ñoñ Ntí Yesus, néa fe wulugán ébe éñe, ⁷mbemann ya nkomann ébe éñe, míní yém á mbwínánn été, ámvála míní ngá ñoñ meyágalé, míní fwíge fe ya mvéán akíba.

⁸Dággán ná mot enziñ a nza ke ya mína mikómm ébe fak mot binam ya benzeze meduk, amvála ané omvúgá bot ó ne, ané metárage mé mam méye éniñ dzí mé ne, se ámvála Kristo.

⁹Amú ná nswánn Nzamá ó tós ébe éñe ndzálánn ané mot binam. ¹⁰Éde ébe éñe míní tóbo yaá ndzálánn; éñe á ne nló ye édzwée ése ya nguu edzwée ése; ¹¹ébe éñe fe míní ngá tóbo nkíkgán mekeé, éwí ó ne mbóann se ya mó, fáve niané bé ngá véa ñúu mot binam ébe nkíkgán ákeé Kristo; ¹²niané míní ngá tóbo ndzepbann mínabe bó ya áduubánn, ébe éñe míní wómo yaá fe mínabe bó fufúlu ya mbwínánn ébe é mora nguu Nzamá a ngá wómo ñí ya do á miwúán été. ¹³Éde míní mbé miwúán bívuzá byenan été, kaa ki ya nkíkgán mekeé ye é ñúu denan, ñí a vé yaá mína eniñ mínabe bó fufúlu, eé dzwii fe bívuzá byea bíse, ¹⁴aá mana tsam é kálara mvólá bé ngá nómán bía á ngamm áyát, á vea do e mbé é yéján énzénzan, á dómle fe do á krús. ¹⁵Aá mana téle bidzwée swēñ ya menguu bídzwée, aá lére bó osoán éndendañ ósú bésesé, eé lére fe ná a wún yaá bó ébe émyen.

Étós filí denan

¹⁶Édo ná, míní táa yébe ná mot enziñ ákík mína nsan, ébe bidzí, ngé meñú, ngé édí ye mos fét, ngé mos ye fét mfefēñ ngwan, ngé ki é mos Satará; ¹⁷é mam má mé ne evagle ye éma mé nkún nzu léreban, ve ñá mfañ dzam ye éma méte ñí a ne Kristo.

¹⁸Mot enziñ a táa lík ná míní dzímle dás, eé kómo lére nsilann ñúu ósí, ya fe nkañann ye baáñgel, eé kóbo é mam aa dzó ná á yén, eé tóbo fe ndzálánn ya nzeze éngúnj ya asímánn mot binam, ¹⁹bá kaa ki tóbo elat

ya Nló, éwí ñúu ngúrá, da vém e tɔɔ fe nlatán ya moŋ mé ñúu, méé túga vegan ya ávém ámvála Nzamá aa kómo.

Mfefeñ eniŋ ébe Kristo

²⁰Dá é tɔɔ ná, míní wú yaá mínabe Kristo ébe metáraga mé mam méye éniŋ dzí, amú dzé mína ke á metsiŋŋ mé mot binam ásí, ámvála ané bot bá niŋ é sí ñí: ²¹“O táa twáa! O táa kyak! O táa nama!”? ²²Mam méte mése mé ne ntélán á mfá ye ná má ke má wú ntuk, béé belan ya mɔ, ámvála metsiŋŋ ya méyágalé mé mot binam bí ne. ²³Mam méte má léreban ngúrá mfá, ámvála ané mé ne ya kén, ébe á nyébé mot binam émyen a téle yaá, á mfá ye á nsilann é ñúu mot émyen ósí, ná aa kili fe é ñúu deñ émyen mam; ve dea, mam méte mé ne kaa eban enziŋ ébe ayónŋ ye á bivée bíye é ñúu mot binam.

3 ¹Dá é tɔɔ ná míní wómo yaá fufúlu mínabe Kristo, dzéŋŋán mam méye ó yóp, é vóm Kristo a tɔɔ ósí é wéá meyóm Nzamá. ²Témŋán mam méye ó yóp, se é má méye ó sí, ³akála ná míní wú yaá. Éde, biniŋ byenan bí swala fufúlu mínabe Kristo ébe Nzamá. ⁴Éde niané Kristo, éñí a ne éniŋ dzenan aa ye váma, eyɔŋ te, mína mína ye fe váma mínabe bó á dúmá été.

⁵Ya dzam te, ywíñŋán á mészúk mé ñúu menan edí ye ósí, ané nsém m eveák, mvin mam, áwulu tugá, bembéa mikómánn, ya oyéá byém, éwɔ ó ne nkanŋann biyemá; ⁶ákála mam méte, áyéá Nzamá dá nzu ébe bwán béye meló. ⁷Ómvús mína míní ngá wulu fe mam méte été, míní niŋ fe mɔ été. ⁸Ve éndagá, veagán fe énzénzanŋ denan été é mam má mése; meyéá, olúnn, nlém abé, nkóbo abyann, nkóbo ó ne mvin wá kwíñ ánu denan été. ⁹Míní táa bó mineá bevóó ya ébá bevóó, akála ná míní swálá yaá nnomm mot ya mefúlu meñ.

¹⁰Éde míní bwára yaá fe mfefeñ mot, éwí wa ke wa bó mfefeñ á nyemann été, ámvála éfonann éñí a ngá vele wɔ é ne. ¹¹Véa, éñe mwán griego ya judio a sés, nkíkgán akeé ya kaa nkíkgán akeé ó sés, ngé nyín, ngé mwann Esita, ngé oloá, ngé ki filí mot; fáve ná Kristo éñe a ne ásesé ébe bésesé.

¹²Édo ná, ámvála ané mítópbán mí bot Nzamá, ya ébá bé téle eki ya fe mindzindziŋŋ, bwátgán nlém engóngóó, ya esós, ya nsilann ñúu ósí, ya evwévwé nlém, ya fe edzí; ¹³nzomoŋán bevóó ya ébá bevóó, dzwiigán fe bevóó ya ébá bevóó. Ngé mot enziŋ a belé mikéá ya éñí mbóó, ámvála Kristo a ngá dzwii mína, ámvála te fe mína bógan. ¹⁴Ébe é mam má mése, ósúá edziŋŋ, édo é ne edí dá dzálá elat.

¹⁵Éde é mvwaá Kristo é dzwéege milém myenan été, édo bé ngá lwée mína ya do ébe ñúu fúó, váán fe Nzamá akíba. ¹⁶Véa éfiá Kristo dá é bíragá fe tɔbo ébe mína ya kén ése, váán ayágalé, míní lépbán fe mbóó ya éñí mbóó ya besalmo, ya byeá bíye á nkanŋann, ya byeá bíye á nsísim;

míníí yee fe byeá ya é mvɔmm Nzamá á milém myenan été. ¹⁷Éde ébe édí áse mína bɔ, ané efíá, ngé ki mbɔann, bɔgán dɔ áse ébe éyola Ntí Yesus, míníí vé Tará Nzamá akíba ákála éñe.

Eniɲ ye méndá mé bot bebwíni

¹⁸Á biningá, tɔbɔgán édzwée beñu beyóm así, ámvála dá yian ébe Ntí.

¹⁹Á beyóm, dziɲɲán beñu beyéá, kaa tɔbán ya bɔ ya ekán.

²⁰Á bwán, bɔgán beésúá mewók ébe dзам áse, amú ná édí te, édo dá vé Ntí nlém mesán.

²¹Á beéséá, kaa sɔɲɲán é bwán benan, á mfá ye ná bé nza teak.

²²Á aloá, bɔgán bémása benan béye é sí ní mewók ébe dзам áse; se akála ná bé téa mína, amvála ané ngé mot éñe mína kómo vé nlém mesán, fáve ná ya nlém mbɔɔ, míníí kɔ Ntí wɔɲɲ. ²³Éde, ébe édí áse mína bɔ, bɔgán dɔ ya nlém óse, amvála ané ngé Ntí éñe mína bɔ dɔ, se bot, ²⁴míníí yem ná ébe Ntí éñe mína ye ñɔɲ meyáán mé tsígá. Ntí Kristo éñe fe mína séan ya ní. ²⁵Akála ná éñí aa bɔ ekúkwát, aa ye fe ñɔɲ meyáán méye ekúkwát deñ, obea ngamm enziɲ wá ó sés ki.

4 ¹Á bemása, tɔbɔgán ya áloá denan ámvála é ne nzósoó, kaa obea ngamm, míníí yem ná mína míníí belé fe Mása á dzóp été.

Pablo aa dzaa meyaglán

²Tɔbɔgán mbán á meyaglán été, míníí tɔbɔ fe mɔ evévén ya mvéán akíba. ³Tám te ébyen míníí yaglan fe akála dea, á mfá ye ná Nzamá á kúu bía mbéñ ákála efíá deñ ná bí kɔbɔ édí dá nzaman kén mot ébe Kristo, édí te édo fe me ne ya dɔ nkómm, ⁴á mfá ye ná me kúlu dɔ ámvála ma yian dɔ kɔbɔ.

⁵Wulugán ya kén ósú é bot bé sés bebwíni, míníí túga fe yem áduan ya tám. ⁶Mílán myenan mína lwée mí tɔbɔgé ya mvɔmm tám áse, ya mvéáñ á meló, á mfá ye ná míníí yem nzá amvála mína yian áyalan ya kada mot.

Pablo aa lóm é bot bevɔɔ mibóló

⁷Ébe mam mése mam, Tikiko éñe aa ye mína lík ná míníí yem mɔ, ndzindziɲɲ mwadzaɲ ya bébélá mvwála bíséññ, ní a ne fe oloá ébe Ntí fufúlu bíabe bɔ. ⁸Ya dзам te édo maá lóm mína ní, á mfá ye ná mína míníí yem é mam má lot ya bía, ya ná á foɲ fe mílém myenan. ⁹Aa nzu bá Onésimo bébélá ya ndzindziɲɲ mwadzaɲ, a ne fe mot mbɔɔ ye énzénzaɲ denan. Ébɔ bá ye mína bɔ ná míníí yem é mam mése má lot ó vá.

¹⁰Aristarko, éñí bía ní bí ne fufúlu á mbok, aa bérán ya mína, bá Markos ndzimm mwanñaɲ Bernabé. Ákála Markos te fe mína ngá ñɔɲ memvéná. Ngé aa nzu ébe mína, ñɔɲɲán ní mvéáñ; ¹¹ya fe Yesus, éñí bá lwée ná Justo, ébɔ bé ne ébá béye á nkíkgán akeé, ébɔ etámm bá bɔ eséññ fufúlu bíabe bɔ á mfá édzwée ngómán Nzamá, ébɔ fe bé sili yaá ma nlém ósí.

¹²Epafras aa bérán ya mína, a ne fe mot mbóó ye ébe mína, óloá Yesukristo, aa bíra yaglan mbán akála denan biyɔŋ bise, á mfá ye ná míní bɔ beñá bot ya ábiñ ováŋ ébe nkómánn Nzamá óse. ¹³Amú ná ma vé ñí ngañiá ná nlém wá bíra ñí ákelebe ó yóp akála denan, ya akála ébá béye á Laodisea, ya ébá béye á Yerápolis.

¹⁴Lukas, ndzindziŋ dókira, aa bérán ya mína, ya fe Demas.

¹⁵Bérágán ya bɔbédzaŋ béye á Laodisea, ya Ninfas, ya fe ékóánn bebwíni é ne é ndá dzeñ.

¹⁶Niané bé lánje é kálara ñí ébe mína, bɔgán fe ná bé lán ñí ékóánn bebwíni ye á Laodisea, mína míní lán fe éñí aa sɔ á Laodisea.

¹⁷Dzógán fe Arkipo ná, “Túga dága ébe éséññ Nzamá o ngá ñɔŋ ébe Ntí, á mfá ye ná o dzálá dɔ.”

¹⁸Ma, Pablo, ma tsili mbóló wí ya é wéá wɔm.

Símaŋán bekalamekéná bam.

Mvɔmm é tɔbɔgé ya mína.